

NUH terima 'dana' \$120,000 setahun latih rakan serantau

Pemerintah
turut padankan
derma AS\$1j dari
cabang amal
firma bekalan global

KAKITANGAN penjagaan kesihatan Hospital Universiti Nasional (NUH) kini dapat menggunakan 'dana' tambahan \$120,000 setahun dalam usaha melatih rakan-rakan mereka di Asia Tenggara dan China.

Ini menyusuli sumbangan AS\$1 juta (\$1.35 juta) yang diderma Yayasan Fung – cabang amal firma pengurusan bekalan global Li and Fung Limited – yang kemudian dipadankan pemerintah Singapura.

Secara keseluruhannya, wang terkumpul yang mencecah AS\$2 juta itu akan diletakkan dalam dana endowmen Universiti Nasional Singapura (NUS).

Pulangannya, sekitar \$120,000 setahun, akan dilaburkan kepada usaha menghantar kakitangan fakulti perubatan NUS atau NUH ke luar negara mengajar kemahiran perubatan.

Ia juga boleh digunakan untuk membawa kakitangan perubatan dan doktor muda dari negara membangun meraih pengalaman di NUH.

Program Fellowship Klinikal Fung diumumkan hartawan pengurusan bekalan global, Encik Victor Fung, dalam Puncak Kepimpinan Penjagaan Kesihatan Fung di sini semalam.

Presidennya, Profesor Tsui Lap Chee, berkata:

"Ini cara kami menyumbang kembali kepada masyarakat."

Profesor Madya Sunil Sethi, yang mengetuai jabatan perubatan makmal NUH, berkata sebelum ini



LEBIH MESRA PESAKIT: Pusat Perubatan NUH menawarkan penjagaan pesakit yang lebih bersepadu di bawah satu bumbung. – Foto NUH

pihaknya perlu merancang lawatan ke luar negara apabila diperlukan, atau secara berkala, merayu, bersusah payah atau meminjam demi mengumpul dana.

"Kini kami tidak perlu risau tentang pendanaan. Kami juga boleh merancang satu siri program, supaya ada kesinambungan melatih rakan-rakan di luar negara, bukan sesuatu yang dilakukan sekali sahaja,"

kata Profesor Sethi.

Dana itu dibuka kepada karyawan perubatan NUH, termasuk doktor, jururawat dan pekerja kesihatan bersekutu.

Disebabkan endowmen itu akan mengambil masa dalam menjana pulangan, Yayasan Fung bertindak menderma tambahan AS\$100,000 (\$134,000) agar dapat segera digunakan.